

आकाशवाणी

1. भारत ते गुयाना नै सेहत, हायड्रोकार्बन, राई-बाई ते होरने सरबंधत क्षेत्रें च सांझ सैहयोग गी बढावा देने लेई 10 सैहमति पत्रें पर दस्तखत कीते गे।
2. डोकमनिका नै पधानमंत्री नरेन्द्र मोदी होरं गी अपने मुल्खै दे सवोच्च सम्मान डोकमनिका अवार्ड ऑफ ऑनर कन्नै सम्मानित कीता ऐ।
3. राष्ट्रपति द्रौपदी मुर्मू होर अज्ज नमीं दिल्ली च डॉ. हरिकृष्ण महताब उतकल कमेटी दी 125मीं जयंति समारोह दा उद्घाटन करगंन।
4. प्रसार भारती नै अपने ओटीटी प्लेटफार्म "वेक्स" गी शुरू कीता ऐ।
5. सीबीएसई मूजब 10मीं ते 12मीं जमात दे बोर्ड मतेयान 15 फरवरी 2025 थमां शुरू होंगन।
6. हॉकी च भारत नै चीन गी 1-0 कन्नै हराइयै महिलाएं दी एशियाई चैपियन्स ट्रॉफी जित्ती लैती ऐ।

<><><><><><>

PM-Gyuana

भारत ते गुयाना नै सेहत, हायड्रोकार्बन, राई-बाई ते होरने सरबंधत क्षेत्रें च सांझ सैहयोग गी बढावा देने लेई 10 सैहमति पत्रें पर दस्तखत कीते न। चिकित्सा उत्पादें, जन औषधि योजना, सांस्कृतिक आदान प्रदान कार्यक्रम गुयाना च सूपीआई प्रणाली लागू करने ते प्रसार भारती ते गुयाना दे राश्टोय संचार नेटवर्क बश्कार प्रसारण दे क्षेत्र च सैहयोग पर समझौता ज्ञापन पर दस्तखत कीते गे। एहदे अलावा राश्ट्रीय रक्षा संस्थान, गुयाना ते राश्ट्रीय रक्षा विश्वविद्यालय, गुजरात बश्कार समझौता ज्ञापन पर दस्तखत कीते गे। प्रधानमंत्री नरेन्द्र मोदी ते गुयाना दे राष्ट्रपति मोहम्मद इरफान अली बश्कार कल संजा जार्ज टाउन च प्रतिनिधिमंडल स्तर दी गल्लबाज मगरा दौनें मुल्खें बश्कार समझौते पर दस्तखत कीते गे। गुयाना दे राष्ट्रपति होरें आखेआ जे प्रधानमंत्री हुंदे कन्नै चर्चा बड़ी सकारात्मक रेई। एह दपक्खी सरबंधें गी मजबूत करने ते क्षेत्रीय ते वैश्विक चिंताएं गी सैहयोगत्मक रूपै कन्नै संबोधत करने दे उंदी सांझा प्रतिबद्धता गी बी मजबूत करदी ऐ। प्रधानमंत्री

मोदी हुंदी तरीफ कीती ते विकासशील मुल्खें च उंदी असरदार अगुवाई ते योगदान आस्तै उनेंगी नेताएं बश्कार चैपियन दस्सेआ।

<><><><><><>

PM-Dominica

डोमिनिका नै प्रधानमंत्री नरेन्द्र मोदी होरं गी अपने मुल्खै दे सवोच्च सम्मान डोकमनिका अवार्ड ऑफ ऑनर कन्ने सम्मानित कीता ऐ। डोमिनिका दे राष्ट्रपति सिनवैनी बर्टोन होरें कोविड-19 महामारी दे दरान डोमिनिका दी मदद करने ते दौनें मुल्खें बश्कार दोस्ती गी मजबूत करने लेई एह सम्मसन मोदी होरें गी दित्ता ऐ। प्रधानमंत्री मोदी होरें आखेआ जे एह सम्मसन 140 करोड़ भारतवासिएं गी समर्पित ऐ। उनें आखेआ जे एह सम्मान उंदा नेई सगुआं 140 करोड़ भारतवासिएं दे जतनें ते परम्परा दा ऐ। उनें आखेआ जे भारत ते डोमिनिका महिलाएं गी बाइख्खियार बनाने लेई दुनिया लेई मिसाल न। उनें इस गल्ला दा संदोख जताया जे भारत कोविड महामारी दरान डोमिनिका दी मदद करी सकेया।

<><><><><><>

President

राष्ट्रपति द्रौपदी मुर्मू होर अज्ज नमीं दिल्ली च डॉ. हरिकृष्ण महताब उतकल कमेटी दी 125मीं जयंति सरारोह दा उदघाटन करगंन। इस मौके पर डॉ. महताब हुंदे सम्मान च इक यादगारी टिकट ते सिक्का बी जारी कीता जाग। डॉ. महताब हुंदा जन्म 21 नवम्बर 1899 च ओडिशा दी अगरपारा थाहर होआ हा। ओह भारतीय इतिहास दी बड्डी हस्ती हे जेह्ड़े इक महान स्वतंत्रता सैनानी, राजनीतिज्ञ, इतिहासकार, लखारी, समाज सुधारक ते पत्रकार हे।

<><><><><><>श

President-Telangana

राष्ट्रपति द्रौपदी मुर्मू होर अज्जै सवां तेलंगाना दे 2 दिन दे दौरे पर रौंहगन। अपने दौरे दरान राष्ट्रपति होर कोटी दिपोत्सवम-2024 च हिस्सा लैंगन। कल राष्ट्रपति होर हैदराबाद च लोकमंथन-2024 च उदघाटनी भाषण देंगन।

<><><><><><>श

IFFI

राष्ट्रीय लोक प्रसारक, प्रसार भारत नै अपना ओटीटी प्लेटफार्म वेब्स जारी कीता ऐ। गोवा च कल 55में भारतीय अंतर्राष्ट्रीय फिल्म महोत्सव इफ्फी दे उद्घाटन समारोह च एहदी शरूआत कीती गई डिजीटल स्ट्रीमिंग सेवाएं दी बघदी मंग गी पूरा करने दे कन्नो कन्नी वेब्स दा मकसद आधुनिक डिजीटल रूझाने गी अपनां दे होई परानी यादें गी ताजा करना ऐ। वेब्स च रामायण, महाभारत, शक्तिमान ते हम लोग जनेह शो शामिल न। प्रसार भारती दे अध्यक्ष नवनीत कुमार सहगल होरें आखेआ जे वेब्स होरने ओटीटी मंचें दी तुलना च अनूठा ऐ। एह होरने सेवाएं दे कन्नो कन्नी स्वच्छ ते पारिवारिक मनोरंजन बी करदा ऐ। एहदे थमां पैहले कल डॉ. श्यामा प्रसाद मुखर्जी इंडोर स्टेडियम च आईएफएफआई दी रंगारंग शरूआत होई। एह इस म्हीने दी 28 तरीक तगर जारी रौहग।

<><><><><><>श

CBSE

केन्द्री माध्यमिक शिक्षा बोर्ड सीबीएसई नै 10मीं ते 12मीं बोर्ड मतेयान 15 फरवरी 2025 थमां शरू होने दी घोषणा कीती ऐ। बोर्ड नै आखेआ जे 10मीं दे मतेयान 18 मार्च गी खत्म होंगन जदके 12मीं दे मतेयान 4 अप्रैल गी सम्पन्न होंगन। एह पैहली बारी ऐ ते सोबीएसई नै 86 दिन पैहले बोर्ड मतेयानें दी तरीकें दी घोषणा कीती ऐ। सीबीएसई नै आखेआ जे बक्ख-बक्ख दाखला मतेयानें दा रखदे होई 12मीं जमात दे मतेयानें दी तरीक तैह कीती गई ऐ।

<><><><><><>श

Janjatyiya Mohatsav

मुख्य भरै च शक्षणिक संस्थानें च भगवान बिरसा मुंडा हुंदी विरासत गी चेता करने आस्तै जनजातीय गौरव पखवाड़ा सनाया जा'रदा ऐ। केन्द्र सरकार आदिवासिएं दे आर्थिक सशक्तिकरण पर ध्यान केन्द्रित करियै उंदे जीवन गी बदलने लेई वचनबद्ध ऐ। भारत दे आदिवासी उत्पाद अंतर्राष्ट्रीय सतह पर लोकप्रिय होआ'रदा ऐ। अरकू कॉफी नै 2017 च पेरिस च अपनी पैहली ऑर्गेनिक कॉफी शॉप खोली, जिन्ने वैश्विक बजारें च अपनी थाहर बनाई। इसै चाल्ली छत्तीसगढ़ दे महुआ फूल्ले फ्रांस सने अंतर्राष्ट्रीय बजारे च अपनी थाहर बनाई ऐ। शॉल, चित्रकला, लकड़ी दा समेयान, गैहनें ते टोकरिएं जनेह आदिवासी उत्पाद तेजिया कन्ने लोकप्रिय होआ'रदे न।

<><><><><><>

NIA Jammu

राष्ट्रीय जांच अर्जेसी एनआईए अज्ज जम्मू कश्मीर दे बक्ख-बक्ख हिस्सें च छापेमारी करै करदी ऐ। एह छापेमारी आतंकवादिएं दी बन्ने पारा घुसपैठ कन्ने जुड़े दे मामलें च कीती जा'रदी ऐ। समाचार अर्जेसी एएनआई नै दस्सेआ ऐ जे एह छापे रियासी, डोडा, उधमपुर, रामबन ते किश्तवाड़ जिलें सनें कुल 8एं थाहरें पर मारे जा करदे न। खीरी खबरां थहोने तगर इनें छापे दरान बरामदगी दी जानकारी हासल नेई ही होई दी।

<><><><><><>

Hockey

हॉकी च कल भारत नै बिहार दे राजगीर हॉकी स्टेडियम च खेड्डे गेदे फाइनल च चीन गी हराइयै महिलाएं दी एशियन चैंपियन्स ट्रॉफी दा खताब जित्ती लैता। चीन गी कल 1-0 कन्ने हराइयै लगातार दूई बारी एह खताब भारत नै अपने नां कीता ऐ। उआं भारत एह खताब कुल 3 बारी जित्ती चुके दा ऐ ते इआं करियै उन्ने दक्खन कोरिया दी बरोबरी करी लैती ऐ। कल होए दे फाइनल मकाबले च भारत दी तरफा दीपिका नै 31में मिनट च पैनल्टी कार्नर कन्ने गोल करियै मैच अपने पक्ख च करी लैता। दीपिका नै इस पूरी प्रतियोगिता च कुल 11 गोल कीते न ते उसी प्लेयर ऑफ द टूर्नामेंट कन्ने सम्मानित कीता गेआ। एहदे शा पैहले जापान नै मलेशिया गी 4-1 कन्ने हराइयै प्रतियोगिता च त्रीह थाहर हासल कीती। राष्ट्रपति द्रौपदी मुर्मू ते उपराष्ट्रपति जगदीप धनखड़ होरें महिला एशियन चैंपियन्स ट्रॉफह जित्ते लेई भारतीय महिला हॉकी टीम गी श्भकामनां दित्तियां न।

<><><><><><>